

Kurzvortrag von Br AM Hanspeter Schwab, vom 17.11.2021 in der Fellenberg-Loge Nr 3

Gedanken zum Jahresthema 2021 'Vertrauen'

Vertraue bezeichnet d'Überzügig vo dr Richtigkeit vo dr Wahrheit vo Handlige und Isichte.

Die usgschtreckti Hand isch äs Zeiche vo dr Vertrauensbindig. Sie isch ir hütige Corona Zyt öppis i Hintergrund grate. Was isch dr alternativ Blickkontakt ohni d'Händ z'gäh? Das isch jedem sälber überlah, wie er sis Vertraue gegenüber andere zeigt.

Wie schafft me Vertraue, wo fahts a?

Bereits vor em irdische Dasi? Bim härewachse vor dr Geburt vo mene Gschöpf, was ja ou bi de Tier cha si und ja ou zum Fortbeschand vo dere Art dient. Somit gäbe irdische Wäse, sprich d'Eltere bereits äs Vertraue i das Gschöpf. Gspürt das härewachsende Gschöpf bereits das Vertraue vo Muetter u Vater? I weiss äs nid. Isch das erwise, erforscht?

Vertraue entsteht us em 'Gmeinsame', vore intakte Beziehig im Alltag und ou bir Arbeit, u muess ständig wachse. Ou gmeinsam mit Niederlage chöne um z'ga, cha ds Vertraue sterche.

Im Private isch die gägesitigi Akzeptanz ä wichtige Beschandteil vom Vertraue. Gspräch führe, d'Sorge vo dr Partnerin, vom Partner lehre kenne u si chöne a'näh. Derzu ghört ou ä gwüsse Freirum, wo me andere überla sötti. Ds gilt ou bsunders de Chind gägenüber. Ou ihne isch ä Freiraum z'überlah, das gägesitige Vertraue z'feschtige, denn d'Pubertätszyt macht es meischtens nid immer einfacher. Wi steits bi üs mit em Vertraue, zu üs sälber, zur Umwält und andere Asichte?

Verschiedeni Grundregle für s'Vertraue

- Über Ängscht u Sorge brichte
- Outhentisch blibe
- Ehrlich u ufrichtig si
- Offe mit Fähler umgah u sich dene stelle
- Sich Zyt la
- Guet zuelose schafft Vertraue
- Vertraue gä um Vertraue z'übercho

Vertraue gwinne, sich z'entschuldige isch kei Niederlag, Vertrauens-Krisene bewältige u wüsse wie me Vertraue 'verspielt'.

Vertraue isch wie äs Blatt Papier! Isch es einisch zerknitteret, chas nüm ganz glatt wärde.

Wäm vertrout die hütigi Gesellschaft am meischte u wäm am wenigste?

94 % de Füürwehrlüt, 93 % de Pilote u 91 % de Pflegefachlüt. Am Schlusslicht stöh mit: 11 % d'Outoverchäufer, mit 27 % d'Journalische u am wenigste vertroute me mit 6 % de Politiker.

Wie Chinder lehre misstrouisch z'wärde

Jede Mönsch het sich i sim Läbe ä bestimmt Grundistellig gägenüber andere Mönschen zuegleit. Die Grundistellig entwicke mir ufgrund vo üsne Erfahrig, bsunders us üsne Chinderjahr. Chlini Chind hei äs absoluts Vertraue i ihri Umwält, bis sie erfahre, dass sie enttäuscht wärde chöi.

Für Chinder chöi das folgendi Situatione si:

- We si Hilf bruche u niemer da isch;
- We Mami oder Papi öppis akündige u nid i'halte;
- We a si, z'höchi Aforderig gestellt wärde, wo sie nid chöi erfülle u si so immer wieder erläbe, wie sie versäge;
- We d'Eltere sie grundlos schlö oder beschimpfe;
- We d'Eltere sie überbehüete u d'Chind dermit keini eigeni Erfahrige mache chöi;
- We d'Eltere lunisch si u iri schlächte Lune a de Chind uslö;
- We d'Chind sich ire Situation hiflos usglieferet fühlle, wie zum Bispiel imene längere Chrankehusufenthalt, we ä Eltereteil stirbt oder wenn sich d'Eltere trenne.

I settige Situatione entwickle Chind, äs chliners Vertroue i ihri eigene Fähigkeite, i die von andere Mönsche u ou id's Läbe.

Vertroue zu Mitmönsche, isch für üses seelische Wohlbefinde u für befridegendi Beziehige zu dene, wichtig. Misstroue mir andere, läbe mir ständig i Angscht, betroge u hintergange z'wärde u das vergiftet üsi Beziehige oder zerschört die.

Isch Vertroue ä Wärt?

Vertroue ch me gwinne, verlüre, verspile, missbruche aber ou gniesse. Vertroue schafft Nechi und stercht üs nid nume persönlich, sondern ou im Umgang mit andere. Mir alli erläbe Vertroue als ä elementare Wärt. Wes üs gschänkt wird oder we mir das erläbe, i dr Familie, i dr Beziehig, i üsem Bruederbund oder ou im Unternäme.

I welne Situatione isch Vertroue wichtig?

Vertroue isch notwändig um kooperiere z'chöne: I intime Partnerschafte, i Fründschafte, am Arbeitsplatz. I unändlich villne alltägliche Situatione spielt Vertroue ä Rolle. Eltere chönti ohni Vertroue i 'Kita-Mitarbeitendi', ihri Chind nid la betreue.

Gägesitigs Vertroue

Luegt me Vertroue als 'Gä u näh' u als tragendi Chraft vom mönschliche Mitenand a, entfaltet sie ä höchst produktivi Eigidynamik. Äs üserscht wärtvolls Guet im zwüschemönschliche Mitände, isch das Vertroue.

No meh zum Vertroue

Wie steihts mit em Vertroue i üsere Loge, i üsere Bruderschaft, i dere Corona-Situation (gimpft, genese u getschtet)? Zu üsere Gross-Loge, mit allne neue 'Egge', sprich Modernisierige. Altbewährts wird hinter üs glah u dr moderne Zyt a'passt, wie zum Bispiel mit neue Ritual u vilne wytere Frage für üs 'Fellebärger'. Wie wird üses Beamtekollegium bschtellt? Dür Absänze oder dürs Nachrückle vo jüngere Brüeder? Äs brucht ä dringendi Uffrüschtig mit nöie Brüeder. Hei mir Brüeder Vertroue i d'Zuekunft vo üsere Loge?

Wär cha die Frage beantworte? Söue die Frage hüt diskutiert wärde? Ig gloube nid hüt, denn die Frage chöi i'nere rituelle Sitzig i'bunde oder nach äre rituelle Sitzig im chline Refektorium besprochen wärde. Vos miner Meinig nach zu meh Diskussionen chunt, da mir im chline Refektorium meh u lenger rede.